



GEMEINDE/VISCHNAUNCA  
DISENTIS/MUSTÉR

Cussegli da vischunaunca  
33-2021/2024

# Solar Alpin Disentis

## Credit per giudicament dil liug

### M E S S A D I

dalla suprastonza communalia al cussegli da vischunaunca


Stimada signura presidenta  
Preziadas signuras cusseglieras  
Prezai signurs cussegliers

Igl onn 1993 ei vegniu realisau a Caischavedra la pli gronda ovra solara en las Alps Svizras cun ina prestaziun da 0.1 MWp. L'ovra Desertasol ha custau 3.2 milliuns francs ed ei vegnida subvenziunada cun 90 %. Quei ei stau in'ovra da piunier. Oz – 30 onns pli tard – ha Mustér la schanza da realisar sco emprem partenari svizzer da SOLALPINE in'ovra fotovoltaica cun ina prestaziun da 32 MWp.

Il project visiunar senumna SOLAR ALPIN DISENTIS ed ei in dils gronds projects da solar alpin en Svizra. Solar Alpin Disentis possibilitass a nossa vischnaunca da seposiziunar sco liug turistic cun producziun d'energia schubra.

## 1. Introducziun

Igl onn 1947 ei vegni realisau a Mustér il lag da fermada a Barcuns. Ils onns 1962 - 1968 ein ils lags da fermada S. Maria, Nalps e Curnera vegni erigi. A siu temps ein ils possessurs da terren stai avon la decisiun da secunvegnir culs interessents ni da schar expropriar lur possess. Oz ein quellas impurtontas ovras hidraulicas en possess dall'Axpo Hydro Surselva SA. Quella societad appartegn all'Axpo e sa realisar oz grondas ovras solaras el liug dils lags da fermada senza indemnizar a nus indigens il rap solar.



*La muntanera da biestga sper il Lag Brit*

Actualmein vegn fatg el Grischun en pliras vischnauncas preparativas per la realisaziun sperta d'ovras solaras alpinas. Cun la IG Solalpine ha Mustér oz in partenari cumpetent ed engaschau sco representant denter ils investurs interessai, la Societad sempla Alp Run Disentis/Mustér (SARM) e la vischnaunca che s'engascha pil pagament d'in aschinumnau rap solar als iniziants. Quei fatg ed il fetg grond interess dils investurs da realisar a Mustér ina gronda ovrta solara alpina possibilitescha da realisar in project da generaziuns cun entradas durablas per la SARM, nossa vischnaunca e dad interpresas indigenas.



Mintgina da nossas acziuns ha in effect sin enzatgi auter.

## **2. La situaziun d'energia en general sco era las cundiziuns tenor las mesiras urgentas per metter a disposiziun a cuorta vesta in provediment d'electricitat segir duront gl'unviern**

Ella media annuala ha la Svizra bein produciu ils ultims diesch onns circa 2.5 % dapli electricitat che quei ch'ella ha consumau. Igl unviern perencunter surpassa il consum la producziun en la medema perioda per 10 %.

Quella largia d'electricitat duront gl'unviern vegn a s'augmentar entochen igl onn 2050 cun vehichels electrics e pumpas da calira sin 45%, era sch'ins po spargnar entochen lu 20 % dil consum d'electricitat restont. Cun sclauder las ovras atomaras s'augmenta quella a 65 %, aschinavon che novas fontaunas en Svizra reduceschan buca quella largia.

El center stat en quei connex la producziun d'electricitat solar; ovras electricas cun energias fossilas stattan en cuntradicziun cun las obligaziuns dalla Svizra da sbassar l'immissioni da CO<sub>2</sub>, ferton che la forza da vent vegn savens buca acceptada localmein. Sin edifecis ei la fotovoltaica sempel da realisar. Quell'applicaziun tonscha denton buca d'emplenir la largia futura, era sche tut ils tetgs existents vegnessen utilisai. Effectivamein vegnan denton biars tetgs buca cuvretgs cun indrezs fotovoltaics, pertgei ch'ils proprietaris opponan encunter quell'opziun ed era ils cuosts.

Sco surfatschas supplementaras restan ils cuolms. Indrezs fotovoltaics els cuolms produceschan entochen treis gadas dapli electricitat muort munconza da nebla cumparegliau cun la Bassa ed ein aschia la sligazion idealia per compensar la munconza d'energia duront gl'unviern.

Igl atun 2022 ha il Parlament federal simplificau las cundiziuns generalas per implorts alpins da fotovoltaica da gronda dimensiun – sur 10 GWh – cun cumpletar la lescha federala d'energia cun pusseivladads davart mesiras urgentas per garantir a cuort termin in provediment electric segir duront gl'unviern. Igl artechel 71a dalla lescha federal d'energia ei limitaus entochen ils 31 da december 2025.

Per stabiliments che vegnan realisai tenor quella lescha valan denter auter ils suandonts levgiaments: Il basegns ei cumprovaus, ils stabiliments valan sco ligiai al liug, negina obligaziun da planisaziun necessaria (en special crodan la planisaziun directiva dils cantuns). Igl interess vid la realisaziun vegn da principi avon auters interess da muntada naziunala, regiunala e locala.

Ulteriuramein metta il Parlament federal en vesta subvenziuns pils emprems stabiliments. Tochen ina producziun totala annuala da 2 TWh duein ils implorts survegnir contribuziuns, sche quels produceschan mintg'onn silmeins 10 gigawatts e gl'unviern silmeins 500 kWh per kWp e ch'ein colligiai entochen la fin digl onn 2025 silmeins per 10% cun la reit. Il rinfors necessari dalla reit duei vegnir surprius da Swissgrid.

Quei spazi da temps pretenda in agir fetg spert. La revisiun corrispondenta dall'ordinaziun federala d'energia – specialmein ils artechels 9b entochen 9h dall'ordinaziun federala d'energia ei entrada en vigur igl emprem d'avrel 2023. Actualmein ei il cantun lundervi da preparar l'ordinaziun corrispondenta per reglar la procedura d'approbaziun sin palancau cantunal.

La lubientscha vegn concedida dil cantun. Persuenter basegna ei il consentiment dalla vischerna pertuccada e dils proprietaris da terren. Era in'examinaziun ecologica digl ambient resta necessaria. La procedura da baghegiar succeda semegliant alla procedura per baghetgs e stabiliments ordeifer la zona da baghegiar (EOZ/BAB). El rom dall'ordinaziun cantunala regla il cantun las autoritads cumpetentas per l'approbaziun resp. il consentiment dils singuls projects. Suenter il temps da diever ston ils implorts vegnir spazzai cumpleinamein.

### **3. Presentaziun IG Solalpine**

La IG Solalpine ei vegnida fundada il november 2021 da quater umens dil fatg muort panzieri davart la gronda largia d'energia duront gl'unviern che vegn spitgada.

La IG Solalpine vul perquei promover la construcziun d'indrezs fotovoltaics alpins en Svizra. Per quei intent vul ella d'ina vart meglierar las cundiziuns generalas da basa che promovan l'acceptanza ella populaziun per indrezs fotovoltaics. Da l'autra vart vul ella accelerar directamein la construcziun dils implorts.

La cuminanza d'interess Solalpine vul sviluppar in standard per implorts solars alpins. Quel duei cumpigliar puncts sco cundiziuns da contract cun proprietaris da terren e vischerna inclusiv indemnisiun pil dretg da baghegiar (rap solar), aspects digl ambient, ulteriuras pusseivladads da nez dil terren, estetica e la finala reglementar il possess suenter il cuoz dil dretg da baghegiar. Las cundiziuns duein vegnir valetadas en in "soundingboard" naziunal cun persunas dil fatg interessadas che derivan dallas uniuns per la protecziun digl ambient, la branscha d'electricitat, l'administraziun federala e la politica.

La IG Solalpine vul sclarir las premissas dils loghens adattai, aschilunsch che las perspectivas da realisaziun ein bunas avunda. Per realisar igl implant surdat ella il project ad in da ses partenaris. Per quei intent ha ella fatg in medem contract cun 13 differentas ovras electricas.

L'evaluaziun ed il svilup d'in liug adattau per in indrez ensemes cun la IG Solalpine porscha als proprietaris da terren resp. alias vischernas impurtonts avantatgs:

- Els san spitgar exempels da contract fundai e rescan buca – ord intenziun ni ord negligentscha ni nunsavida – disavantatgs entras condiziuns unilateralas. Els san perquei desister da consultar in agen cuseggiader giuridic.
- Els san eleger il realisatur dils implonts ord in vast spectrum da partenaris dalla branscha d'electricitat, d'in singul partenari ni d'ina cuminanza da partenaris. Plinavon vegn il realisatur observaus duront silmeins tschun onns dils ulteriurs partenaris, damai ch'il contract da partenari ligia el per silmeins tschun onns e ch'el ei en cass da success interessaus ch'il contract vegni prolungius.
- Els san consultar directamein ils specialists dalla cuminanza d'interess Solalpine ed incaricar tals da representar lur interess.

#### **4. Menaschi d'alp e consequenzas dil project per l'alp**

Il territori dalla SARM cumpeglia ina surfatscha da 7.8 milliuns m<sup>2</sup>, quei che corrispunda a rodund 9 % digl entir intschesse dalla vischnaunca da Mustér. La SARM cumpeglia 80 dretgs d'alp ed ei en possess da 21 possessurAs da dretgs. Da quels ein 15 sesents en vischnaunca.

Guido Huonder sco administratur, Rico de Castelberg sco viceadministratur ed actuar e Duri Huonder sco cassier fuorman la suprastonza. Stefan Columberg ei revisur da quen.

Naven da 1989 entochen 2022 ha Josef Fuchs da Feusisberg giu priu a tscheins l'alp. Siu nevs Michael Beeler da Bennau ha affittau l'alp naven da 2023 entochen 2031.

La pastira d'alp principala sesanfla sin in'altezia da 1'800 entochen 2'200 m s.m. Il temps d'alpegiaziun cuoza naven dils 20 da zercladur entochen ils 20 da settember. Cargai vegnan mintg'onn rodund 85 tocs biestga. Da quei ein pressapauc 20 vaccas-mumma, 60 tocs biestga schetga e 2 cavals.

La tegia ed il nuegl a Catan surveschan pil menaschi d'alp dalla SARM. Sia pastira en Val Plattas viers il Lag Brit ed ils Umens cun il fecler da Val Plattas ha la SARM schau a tscheins a Silvio Pfister e Doris Theiner, ils migiurs dall'Alp Lumpegnia.

Per possibiltar in menaschi d'alp adequat ha la SARM engrondiu ils onns 1990 e 1991 la tegia ed il nuegl a Catan. Igl onn 2005 e 2006 ei vegniu baghegiau la via naven da Rusettas entochen a Catan. Dapi 25 onns ei vegniu meglierau cuntuadamein la pastira. Muort il grond engaschi dil migiur e la laver gratuita dalla suprastonza ha la SARM saviu realisar tut quels projects senza susteniment dil maun public.

Actualmein ei la SARM vidlunder da sanar siu provediment d'aua che datescha dils onns 1919 e 1964. Il project persuenter preveda cuosts d'investiziun da frs. 195'000.-- e la realisaziun ei previda igl onn 2025.

La surfatscha da pastira dall'Alp Run, nua che Solar Alpin Disentis duess vegnir realisaus, ei vegnida fixada en concordanza cul migiur Michael Beeler e Josef Fuchs. Ils panels da solar vegnissen erigi a tala moda, che la pastira savess vinavon vegnir utilisada era sin la surfatscha nua ch'igl implant solar vegness tschentaus. Cheutras savess il menaschi d'alp vegnir menaus vinavon sco entochen dacheu era suenter la realisaziun da Solar Alpin Disentis.

## 5. Solar Alpin Disentis

L'entschatta december 2022 ha Guido Huonder contactau la IG Solalpine cun la damonda, schebein lezza segidassi da realisar in indrez fotovoltaic sin territori dall'Alp Run. En stretga collaborazion cun dr. Ruedi Kriesi, president dalla IG Solalpine, ha la suprastanza dalla SARM silsuenter preparau in contract da collaboraziun per las lavurs da projectaziun. Sinquei ha la SARM dumandau la vischnaunca, schebein lezza fussi promta da collaborar e finanziar ils cuosts dalla prospecziun e dalla lavour da projectaziun.

Ils 5 da schaner 2023 a caschun d'ina seduta communala denter la suprastanza communal e la suprastanza dalla SARM ha la suprastanza communal decidiu da surprender ils cuosts dalla prospecziun (emprema fasa dil project) e da dumandar il cussegl da vischnaunca da surprender ils cuosts da projectaziun (secunda fasa dil project).

Ils 26 da schaner 2023 ha gerau Clemens Berther presentau il project Solar Alpin Disentis a caschun dils dis da discours davart la perscrutaziun d'energia, organisai d'AlpEnForCe en Clastra Mustér. Suenter quei inscunter han ins enderschiu che l'Alp Run seigi fetg lucrativa per implonts solars.

Ils 3 da fevrer 2023 ha la radunanza generala extraordinaria dalla SARM decidiu unanimamein da suttascriver il contract preparaus cun la IG Solalpine e la vischnaunca. Ils 6 da fevrer 2023 ha la firma Fanzun da Cuera entschiet cun la lavour da prospecziun. La gruppera da lavour ch'empeila il project Solar Alpin Disentis secumpona da sequentas persunas:


Guido Huonder, parsura SARM  
Rico de Castelberg, actuar SARM  
Duri Huonder, cassier SARM  
Clemens Berther, gerau vischnaunca Disentis/Mustér  
Dr. Ruedi Kriesi, IG Solalpine  
Renato Tami, IG Solalpine  
René Meier, Fanzun AG

## 6. Part tecnica

L'Alp Run ademplescha las premissas per producir l'electricitat ch'ei urgentamein necessaria duront ils meins d'unviern. Il realisar in implont fotovoltaic alpin all'Alp Run – en in temps, nua che la Svizra vegn adina pli fetg ad esser dependenta d'imports d'electricitat digl exteriur – ei ina gronda contribuziun per la segirtad da provediment en Svizra.


L'irradiazion annuala dil sulegl ei fetg buna el liug previu (tenor la carta dalla irradiazion globala dil cantun Grischun mutta quella a 1'470 – 1'500 kWh/m<sup>2</sup>/onn). Il pli cuort di digl onn vegn registrau da bialaura 8 uras sulegl. Il mument ch'il cuoz dil di e dalla notg ei tuttina (ils 20 da mars ed ils 23 da settember) ein quei gia 11 uras e 15 minutias. Risguardond la topografia e la meteorologia san ins quintar tenor las datas da statistica annualmein cun ca. 1'871 uras sulegl, da quellas 791 uras duront il miez onn d'unviern.

Cun montar ils moduls solars cun ina pendenza da 60 - 75° sa vegnir duvrau optimalmein la radiazion dil sulegl – quella ei duront il miez onn d'unviern denter 0 - 44°. Quasi la mesedad dalla prestaziun annuala vegn recalgtada il miez onn d'unviern. Leutier gidan las temperaturas bassas el liug (il grad d'efficacitad dallas cellas solaras ei il meglier tier temperaturas fetg bassas) e l'irradiazion pli intensiva entras la refleczion supplementara dalla neiv. Per saver nezegiar aunc meglier la refleczion dalla neiv eis ei previu d'applicar cellas solaras bifacialas. Cun quella tecnologia sa la cella solara midar la refleczion davos il modul solar en forza electrica supplementara. Aschia vegn produciu silmeins 10 % dapli forza electrica che cun cellas solaras monofazialas convenziunalas.



Ovra da test "Mattwaldalpa" el Valleis, maletg P. Bodenmann

La pendenza gronda dils moduls ensem en una distanza sufficienta dil terren possibilitescha che la producziun d'unviern vegn buca sminuida. Aschia seruschna la neiv spert giu dils moduls ed engrevegescha buca memia fetg la sutconstrucziun d'itschal. Pil dimensiunar la sutconstrucziun ei il faktur dallas forzas dil vent decisivs. Per saver tschaffar quellas vegn la sutconstrucziun francada cun ancras el terren.



Entras in'altezia da construcziun da ca. treis meters (sortend dad in'altezia da neiv maximala e dil spazi supplementar per neiv che seruschna) san la biestga, animals selvadis e persunas passar senza impediments.

Indrezs installai sco menziunau produceschan duront il miez onn d'unviern circa treis entochen quater gadas dapli energia en cumparegliaziun cun indrezs ella Bassa nua che la pendenza dils indrezs ei pusseivla cun  $30^\circ$ . Ils loghens alpins han aschia in fetg grond avantatg enviers loghens ella Bassa, il qual duei vegin nezegiaus.



*Visiun: Sin 35 hektaras in implont fotovoltaic, la grondezia da 50 plazs da ballapei*

Nus quintein cun in recav d'electricitat regenerabel da ca. 45 entochen 50 GWh per onn pigl implont fotovoltaic all'Alp Run. Quei corrispunda al basegns d'electricitat da 9'000 entochen 10'000 casadas mesaunas.



*L'Alp Run ord vesta da Stagias*

## **7. Aspects finanzials**

Sch'il project Solar Alpin Disentis vegn realisaus, obtegn d'ina vart la SARM entradas directas dil rap da solar. Da l'autra vart ha la vischnaunca entradas directas da taglia ed il commerci sa profitar d'incaricas da lavur en connex cun la realisaziun da Solar Alpin Disentis sco era cul manteniment da quell'ovra duront 60 onns.

Cun ina producziun calculada da 45 - 50 GWh survegness la SARM annualmein ina indemnisiun da ca. frs. 480'000.--. La vischnaunca savess quintar d'incassar dalla SARM e dils possessurs da dretgs sesents en vischnaunca taglias da rodund frs. 32'500.--/onn. Sch'ei reussescha da contrahar cugl investur che la sedia da Solar Alpin Disentis ha siu domicil a Mustér, profitass la vischnaunca d'ulteriuras considerablas entradas da taglia.

Ina part dallas lavurs per realisar Solar Alpin Disentis cun ina summa d'investiziun da frs. 100'000'000.-- savess vegin surdada a fatschentas indigenas.

Sch'igl indrez solar vegn taxaus sco schischom, savess la vischnaunca quintar cun ulteriuras entradas annualas dalla taglia sin schischom (actualmein 1.7 %).

Cu il project da Solar Alpin Disentis ei realisaus, basegna ei annualmein lavurs da manteniment da ca. frs. 250'000.-- entochen frs. 500'000.--. Suenter 15, 30 e 45 onns ston ils alternaturs (Wechselrichter) e suenter 20 e 40 onns tuts panels solars vegnir remplazzai. Ina part da quellas lavurs savess medemamein vegnir realisada da fatschentas indigenas.

La SARM e la vischnaunca han la finamira da francar el contract da realisaziun la pusseivladad che la vischnaunca sco era las habitontas ed ils habitonts da Mustér san separticipar finanzialmein al capital agen dalla societad Solar Alpin Disentis. Damai che la Confederaziun finanziescha entochen 60 % dalla summa d'investiziun renconuschida, fuss quella participaziun fetg lucrativa.

## **8. Ponderaziuns ord vesta dalla vischnaunca**

Sco ins sa gia leger all'entschatta dil messadi ei nossa vischnaunca adina stada fetg innovativa ella sparta d'energia solara. Ils emprems onns ein bia hospes dalla sparta tecnica vegni a Caischavedra per prender investa da quels stabiliments. Deplorablamein era da lezs onns l'energia memia favoreivla ed aschia ei il svilup solar en Svizra buca vegnius promovius fetg, malgrad che nus havessen giu bunas premissas. La Tiaratudestga ha promoviu sur onns ora enorm l'energia fotovoltaica cun subvenziuns.

Sch'il stabiliment fotovoltaic vegn realisaus sin territori dall'Alp Run cun 60 % subvenziuns, duess la vischnaunca separticipar finanzialmein alla societad cun daners ch'ella ha obtenui pil retuorn a tschep a caschun dall'engrondaziun dall'Ovra Russein a Barcuns. El futur ei quei segir ina vacca da latg pils investurs.

Turisticamein vegness Solar Alpin Disentis promovius cun realisar ina senda fotovoltaica, cumbinada cun tablas d'informaziun davart l'interessanta historia dall'Alp Run e dil grond fuorn da cristallas ella preit dil Péz Cavardiras.

En vesta alla schliata acceptanza d'indrezs da vent ed il liung temps da projectaziun che tals indrezs han, ei la realisaziun d'in indrez da vent sin intsches dall'Alp Run buca actuala. Plinavon muncass la pusseivladad da far ils transports grevs necessaris.

## **9. Mo tgi che semna sa raccoltar**

La suprastonza communal ha valetau igl entir project fotovoltaic all'Alp Run ed ei perschudida ch'in stabiliment fotovoltaic ha pli bia avantatgs che disavantatgs per nossa vischnaunca. Ei dat entradas da taglia e lavur ils proxims 60 onns. Ultra da quei ei la suprastonza communal perschudida ch'ina participaziun en cass d'ina realisaziun dall'ovra fotovoltaica ei indispeteivla. Igl ei plinavon pusseivel ch'il concern che surpren il stabiliment separticipescha als cuosts da manteniment dalla via d'uaul Run. Era la protecziun digl uaul Run vegn favorisada entras quei stabiliment fotovoltaic. Per la situaziun actuala e futura ei l'energia electrica pli che tschercada e sche nus havein la caschun, stuein nus era ughegiar in'investizion commensurada.

Per canticuar cun la lavur dil project Solar Alpin Disentis entras la vischnaunca, la societad sempla Alp Run e la IG Solalpine ei il credit da frs. 119'000.-- necessaris. Naturalmein ei quei ina resca, mo sin fundament dils fatgs dilucidai ei la resca minima. Entochen oz ha la suprastonza concediu per la prospecziun frs. 27'000.--. Ils resultats da quella retscherca ein zun empermittents. Dil mument ch'il project all'Alp Run vegn realisaus, vegn la SARM a restituir alla vischnaunca sura cuosts da planisaziun da total frs. 146'000.--.

A caschun da sia radunanza generala extraordinaria dils 3 da fevrer 2023 ha la Societad sempla Alp Run Mustér incaricau sia suprastonza da contrahar cun la vischnaunca per dar giu a lezza la part d'uaul da schurmetg Run che basegna tgira per in prezi da cumpra da frs. 1.--. Quei ei da considerar sco counterprestaziun pil susteniment dalla vischnaunca per il project Solar Alpin Disentis. Sche la vischnaunca vegn en possess da quella part uaul da schurmetg, ei futuramein la tgira digl uaul ed il recaltgar subvenziuns pli sempel.

## **10. Proposta**

Sin fundament dallas ponderaziun suramienziunadas

### **proposta**

la suprastonza communal al cussegli da vischnaunca da:

- conceder in credit da frs. 119'000.-- (+/- 10 % incl. TPV) per la realisaziun della secunda fasa dil project Solar Alpin Disentis che cumpeglia il giudicament dil liug.

Suprastonza communal Disentis/Mustér  
Il president: Il canzlist:

  
René Epp

  
Andri Hendry

Disentis/Mustér, ils 6 d'avrel 2023

- Resumaziun dalla prospecziun